

30 AUG 1999

Masjid-Barangan

KEDAH AKAN KELUARKAN BARANGAN PENGGUNA CAP MASJID

ALOR SETAR, 30 Ogos (Bernama) -- Kedah akan mengeluarkan barangan pengguna berlabelkan "cap masjid" melalui kaedah sistem pemasaran Islam yang akan dibekalkan melalui kedai-kedai masjid di seluruh negeri ini.

Menteri Besar Tan Sri Sanusi Junid berkata barangan itu akan dikeluarkan setelah kedai-kedai masjid, yang kini baru di peringkat permulaan, beroperasi sepenuhnya di negeri ini.

"Kita akan mengeluarkan baju-T putih dengan cap masjid, sabun cap masjid dan kicap cap masjid," katanya semasa berucap pada majlis perjumpaan Perdana Menteri Datuk Seri Dr Mahathir Mahathir dengan imam-imam dan pegawai masjid seluruh negeri di Wisma Darul Aman di sini, hari ini.

Beliau berkata, kini 20 buah kedai masjid telah beroperasi di masjid-masjid seluruh negeri dan sebanyak 200 buah kedai masjid akan dibangunkan lagi.

Katanya, dengan sistem pemasaran Islam seperti itu ia akan membangunkan ekonomi Islam secara menyeluruh di samping dapat menjadikan masjid sebagai pusat kegiatan ummah.

Di samping itu, beliau juga menyeru supaya imam dan pegawai masjid menilai nikmat pembangunan yang telah mereka kecap.

"Beratus-ratus masjid telah dibina, tanah-tanah kerajaan diwakafkan kepada masjid, balai lintang, perpustakaan dan komputer telah dibekalkan kepada masjid-masjid di negeri ini dan inilah pembangunan yang telah mereka kecap," katanya lagi.

Selain itu, beliau meminta imam-imam supaya dapat menangani masalah perpecahan masyarakat di kawasan masing-masing di samping dapat menangani masalah gejala sosial.

Beliau juga meminta mereka berhati-hati dengan menyatakan: "Kita jangan terlalu cepat berkawan dengan musuh dan jangan terlalu cepat bermusuhan dengan kawan".

Katanya lagi, perpecahan di kalangan umat Islam merupakan kehancuran bagi masyarakat amnya.

-- BERNAMA

MN NMO